

460 Daulis quos misit Progne monumenta nefandæ.
 Quique Anemories, & Hyampolis arva fatigant,
 Qui Panopes loca grata colunt, pinguemque Lilæam,
 Qua vitreis Cephyssus aquis per gramina serpit.
 Hi quadraginta proscindunt navibus æquor.
 465 Has fortis Schedius turmas, & Epistrophus urgent,
 Naubolidæ proles Iphiti pulcherrima uterque.
 Proxima succedunt Phocensibus agmina, Locri,
 Quos Opois fœcunda viris, quos nobilis armat
 Calliarus, Scarphesque, Cynus, nemorosaque Bessa
 470 Perpetuumque polo ridens Augia sereno,
 Et Tarphe, & Thronium, labente Boagrius unda
 Quas rigat, imperio pubes Ajacis Oilei
 Bella gerit, minor ille quidem, nec mole, nec armis,
 Consilio, aut dextra quantus Telamonius Ajax.
 475 Exiguus sane, exigu sed corpore virtus
 Haud temnenda viri: non illo certius astam
 Torserit aut melius Grajorum ex agmine quisquam.
 Quadraginta altis veniens secat æquora rostris.
 Euboicos regit inde viros, genteisque superbas
 480 Martius Elphenor magnorum ductor Abantum
 Chalcodontiades, summas qui Chalcidos arceis,
 Qui Eretriam, atque Styrum, quique alta cacumina Dius,
 Cerinthum æquoream, ac felicia jugera Bacho,
 Istiamque colunt, Cereri ingratamque Caryston.
 485 Hos sequitur bello pubes lectissima Abantes,
 Ferrea gens, latos humeros, perque ardua colla
 Horrida cesaries ollis in tergora pendet.
 Non alii melius pugnantum in pectora docti
 Per prærupta virum scuta, & thoracas ahenos
 490 Invenere viam: quater illi in Pergama denis,
 Sigeumque jugum longis venere carinis.
 Vos quoque in arma viros claræ misistis Athenæ,
 Dives Erechti regio, quem casta Minerva
 Nascentem fovit, quem Tellus extulit alma.
 495 At Dea promeritum temploque, arisque locavit

In propriis, ubi Cecropii per singula cives
 Lustra diem largo taurorum sanguine sacrum,
 Agnorumque agitant. Petri stirps clara Menestheus
 His præterat, quo non Danaum præstantior alter
 500 Instruere æratas equitum, peditumque cohorteis.
 Huic Pylius (sinerent anni) contendet heros.
 Quinquaginta olli parent per litora puppes.
 Bissenas quibus adjungit Salamina relinquens,
 Atque in bella viros rapiens Telamonius Ajax.
 505 At quos Argos equis aptum, portuque profundo
 Hermiones, Asinesque dabant, & quam Herculis alti
 Sublimem celo Tirinthum gloria tollit,
 Træzenque, Ejonque ferax, dilectaque Bacho
 Verum invisa Jovi æquoreas Epidaurus ad undas,
 510 Quique colunt tenuem Æginam, Mazetaque Graii
 Imperio parent Stheneli, Capaneus in oras
 Quem misit genitor Phrygias: simul agmina dicit
 Euryalus, Talajonidæ pulcherrima proles
 Mecistei; tamen ingentis Diomedis uterque
 515 Expectant jussa, & primum reverentur in armis.
 Ilion hi adpulerant cum navibus octoginta,
 At centum pictis sulcant vada salsa carinis
 Quisquis Aræthyreæ frondentia possidet arva,
 Ægion, & Pallenem, atque antiquam Gonoessam,
 520 Orniæque urbem insignem, ditesque Mycenæ,
 Quique Hyperiam, atque Helicem, bimaremque
 Corinthum,
 Atque Cleonæas arceis, regnataque Adrasto
 Quondam rura terunt; & proxima litora circum,
 Et numero ingenti, & præstanti corpore turmæ.
 525 His ipse heroes pulcherrimus inter Achivos
 Imperat Atrides, Tyrioque exultat in ostro.
 Eximiusque armis, & luce coruscus ahena.
 Qui vero umbrosis cinctam Lacedæmonia clivis,
 Et Pharen, Spartenque tenent, Briscia quique
 530 Arva serunt, Messenque, aptissima tecta columbis,

Quos Amyclæus ager, vernans Augæaque pascit,
 Otylos, atque Laas, & Elos prope litora ponti
 Sex denas agitant naveis, quas maximus author
 Ipse mali, rapit in Trojam Menelaus Atrides,
 535 **Hospitis** heu, scelus infandum, raptumque Lacænæ,
 Conjugis ulturus, pictisque coruscat in armis,
 Fervidus, Iliacasque animo jam præcipit arceis.
 Jungitur his Pylios campos, & quisquis Arenam
 Ac bene cultum Æpi, quisquis colit Amphigeniam
 540 Alphæumque bibt circum Thryos arva fluentem,
 Qui Cyparissæam, Pteleonque, ac Dorion ira
 Nobile Pieridum, Thamyrim qua multa canentem,
 Threicium, Eurytho ab Rege, Ochaliaque profectum
 Luminibus, pulchraque orbarunt numina voce.
 545 Dementem! qui se Aoniis opponere Musis,
 Argutoque Deas jactarit vincere cantu,
 Quique Helos, has dicit turmas Neleius heros,
 Nongintaque secant liquentia marmora proris.
 Arcades his subeunt, præstantes Arcades armis,
 550 Qui Riper, Stratemque, atque Orchomenon pecoro-
 sum,
 Mantineamque habitant, ventosaque culmina Enispæ,
 Qui Pheneum, Tegeamque humilem Cyllenia propter
 Culmina, & Epytion tumulum, Stympheiaque arva,
 Parrhasiemque: horum sex denas Rex Agapenor
 555 Ancæ soboles moderatur in æquore puppis,
 Ipse Mycenæus dederat quas providus heros
 Spumantis per iter pelagi ut Trojana venirent
 Litora, nec siquidem genti res nautica cordi est.

V. 534. *Ipse mali.* Author mali Menelaus dicitur, quoniam ejus
 ulciscendi causa bellum suscepsum est.

V. 537. *Jam præcipit arceis.* Eadem significatio hoc verbo
 usus est Virgilius in II.

V. 541. *Dorion ira.* Ita Lucanus eandem hanc fabulam referens.

V. 556. *Ipse Mycenæus.* Locum hunc Homericum adducit cum
 laude Thucydides de bell. Peloponnesiaco.

At qui Buprasios colleis, atque Elidis alma
 560 Rura domant, quotque Hyrmine, atque Alision altum,
 Oleniique ingens saxum, postremaque cingit
 Myrsinus, irrigui felicia jugera campi
 Parebant ducibus quatuor, bisquinque sequutæ
 Quemque rates: primus Cteati dilecta propago
 565 Amphimachus, subit Eurytho satus Actorione
 Thalpius, hinc Amaryncides se mole Diores
 Fert magna, similisque Deo præstantibus armis
 Rege Polyxenus Augida Agasthene natus.
 Dulichium vero, sacras & Echinadas oris
 570 Elidis adversas, circumflua litora ponto,
 Dicit in arma Meges, patriis quem ab sedibus olim
 Dulichium profugus rabieque, odiisque parentis
 Mavorti similem Phyleus genuitque, aliisque.
 Quadraginta olli parent per cœrula pinus.
 575 Parte Cephallenseis alia fert dius Ulysses
 Gentem magnanimam, quæ Ithacam, atque Ægilipæ
 pulchram,
 Et Crocylen, Epirumque colunt, pingueisque Za-
 cynthum,
 Neriton, atque Samon, vicinaque litora contra;
 Bissenisque secat veniens freta cœrula cimbis.
 580 Ætolos in bella Thoas Andræmonæ natus,
 Qui Pleurona tenent, quique Olenon, atque Pylenem.
 Chalcidaque æquoream, & petream Calydonæ regebat,
 Nam neque iam proles aderat prædivitis Ænei,
 Ipsumque, & flavum Meleagrum terra tenebat.
 585 Hic super unus erat, rerum cui tradita summa est,
 Atque quaterdenis proscindit pupibus undas:
 Cretenses tamen Idomenei signa sequuti
 Bella gerunt, quos Gnossus alit, quos lambit Oaxis
 Qui Phæstum, Rhytiunque habitant, cœloque minanteis
 590 Gortinæ muros, quos Lectus pingua culta,
 Myletumque dedit, pecoriisque inimica Lycastos,
 Quotque alii Cretam ingentem, pulcherrima regna,

- Centenasque colunt urbis: hos inclytus hasta
Idomeneus agit, Martique simillimus heros
595 Meriones: octoginta sectantur utrumque
Armatæ juvenum puppes, terno inde subibant
Agmine distincti, atque armis, qui Lindia ferro
Arva terunt, qui Jalyssum, atque ingrata Camiri
Jugera proscindunt Rhodii, Satus Hercule magno
600 Magnus Tlepolemus pubem regit, inclyta virgo
Quem dedit Astiochia Deo commixta procaci
Frondosa ex Ephyre fluvii Selleentis ad undam.
Ille autem patriosque lareis, vultumque verendum
Funere fœdavit, sub quo Lycimnius ævo
605 Jam gravior, Martis proles, & avunculus ipse
Dilectus patri Stygias descendit ad umbras.
Hinc profugus ratibusque cavis, sociisque coactis
Committit sese pelago, namque Herculis olli
Sæva minabantur reliqui gnatique, nepotesque;
610 Ast illum Oceano errantem, ac mala plurima passum
Respexit tandem, ac Rhodias eduxit in oras
Divorum, atque hominum sorteis qui temperat æquus
Jupiter, argentoque viros ditavit, & agris.
Hos naves vexere novem, treis insuper addit
615 Nireus ab Sima, Regi quem protulit alma
Aglaines Charopo, Nireus, formosior alter
Quo nullus Danaos inter, pubemque Pelasgam
Ilion adpulerat, Pelidæ corpore dempto;
Imbellis tamen, exquoque ille agmine septus.

V. 593. Centenasque. Inde Virgilius in tertio

Centum urbis habitant magnas, uberrima regna.

Idem tamen Homerius in Odyssea nonaginta urbes tribuit Cretensibus.

V. 602. Frondosa ex Ephyre. Non solum majorum locorum,
sed etiam urbium singularium nomina cum præpositione efferri posse
pluribus Tullii, & aliorum Latinorum exemplis firmat Ludovicus
Cerda in not. 40, 41, 42. ad lib. 4. Grammaticæ Antonii Nebrissensis.

V. 618. Pelidæ corpore dempto. Hinc Virg. Excepto Laurentiis
corpore Turni.

- 620 At qui Nisyrum pinguem, Crapathumque, Casumque,
Conque, urbem Eurypili, & Nereo amplectente Ca-
lydnas,
Litora culta tenent, Phidippus, & Antiphus acer
Thessalia vehit ex ampla, par nobile fratribus,
Terdenis ratibus quos Thessalus Heraclides
625 Miserat auxilium Menelao. Hos deinde sequuntur
Quique Alopen, Phtiamque tenent, Argosque Pelasgum,
Quisquis Alos Cereri ingratam, lapidosaque Trechis
Arva terit, qui fœminea colit Helladis urbem
Insignem forma Hellenes gens dicta, & Achæi,
630 Myrmidonesque truces: quinquaginta æquore in alto
Stant ratibus; non arma viris, non prælia curæ.
Dux deerat, qui pugnaceis sub signa cohorteis
Cogeret, iratus postquam frendebat Achilles
Pulchricomæ ob raptum Briseidis, ille cruento
635 Lyrressmente bello, ac Thebas populatus opimas,
Quam sibi quæsierat, percussi vulnere multo
Quum terram petiere Mineus, & Epistrophus ingens,
Ambo Selepiadæ Eveni stirps inclyta Regis.
Hæc gemit indignans; Priamo tamen ille dolores
640 Quot feret insurgens, lacrimas quot matribus ægris?
Qui vero Phylacem, Pteleumque, Antronaque linquunt
Vicinam pelago, pecorumque Itona feracem,
Quos in bella viros dat florida Pyrrhasus, almæ
Aptus ager Cereri, his ductor, dum vita superestes,
645 Protesilaus erat; tunc vero Acheronte sub imo
Errabat miser, hastili transfixus acuto
Quum primus Phrygiis vestigia figeret agris.
At pulchras laniata genas vota irrita templis

V. 626. Argosque Pelasgum. Pelasgorum gentem duplēm di-
stinguit Homerus. Altera, de qua hic, Achillem ducem sequeba-
tur; altera, de qua infra, inter Trojanorum auxiliares copias re-
censetur. Virgilius Pelasgorum nomine Græcos omnes universim
appellat, quem nos quandoque sequuti, ut supra admonuimus.

Congeminat conjux, dilectaque pignora, nati :
 650 Pro duce sed tamen extincto fert signa Podarces
 Magnanimi frater germanus Protesilai,
 Phylacidæ Iphicli soboles, cui lata per arva
 Mille greges ovium, totidemque armenta vagantur.
 Ille autem quum ætate prior, tum corpore, & armis.
 655 Quadraginta illum, sociosque in litora Trojæ
 Advexere rates. Succedunt ordine longo
 Qui Bœben, Gaphyrasque, Pheras, limosaque rastris
 Arva domant vitreas propter Bœbeidos undas,
 Umbrososque lacus, formosam quique Jaolcum,
 660 Pinguia prata tenent: undenis navibus æquor,
 Et liquidas secuere vias, Eumielus in hosteis
 Agmen agit, Regi Admeto quem in luminis auras
 Gnatarum Pelix Alcestis pulcherrima fudit.
 Hos sequitur qui Thaumatiam colit, atque Olygona,
 665 Qui Metona tenet, Cererique aptam Melibæam
 Septem armant longas auratis puppis alnos,
 Duxque Medon, claro quem forma insignis Oileo
 Rhena tulit, justis non illa inducta hymenæis.
 Hæc tunc, at quondam turmas, pubemque comatam
 670 Ipse Philoctetes jurata in bella regebat,
 Insignis jaculo, & longe fallente sagitta.
 Illum autem sacra in Lemno procul ulcere tetro
 Fatalis colubri mœrentem classis Achivum
 Liquerat, at serum quanquam, tandem ultima Trojæ
 675 Fata virum Phrygii ducent Simoentis ad undas.
 Quinquaginta intus juvenes per quamque, periti
 Spargere tela manu, & pontum convellere remis.
 Hinc Phœbo chari Podalirius, atque Machaon,
 Ambo Æscapiadæ, terdenis navibus armant

V. 676. *Quinquaginta intus.* Adnotat Thucydides loco supra
 citato Homerum solum designasse numerum remigum in Bœotum
 navibus qui maximum, centum nempe, ac viginti, & in his Philo-
 cete, qui minimi gerebant.

680 Quotquot Tricca viros, quotquot dabat aspera Jthome,
 Regiaque Eurythi Æchalia. Exinde arva tenebant
 Quæ Ormenion, Titanique albentia culmina gentes,
 Asteriumque colunt, fontemque bibunt Hyperium,
 Ductore Eurypilo, claro cui Evæmone gnato
 685 Terdenæ parent Trojano in litore puppes:
 Qui vero Argissam, albentisque Olossonis agros,
 Ortenque, atque Elona tenent, subsunt Polypæti
 Pirithoi soboli, genitor cui maximus ipse
 Jupiter, at fortè Polypætem regia virgo
 690 Hippodamia duci genuit commixta superbo,
 Setigeros quum Centauros monstra horrida abegit
 Pelio ex alto, inque Æthicia transtulit arva.
 Non solus tamen; huic adstat Mavortia proles
 Cœnidaque Corone satus regit arma Leonteus.
 695 Quadraginta altis findunt hi marmora proris
 At Guneum ab Cypho sequitur gens dura, Peræbi
 Dodonem circum gelidam, torvique Enienes,
 Jugera quique colunt, Stygia Titaresus ab unda
 Quæ rigat, in Peneum latices agit inde sonanteis,
 700 Immixtusque olei in morem superenatat amnis,

V. 692. *Pelio ex alto.* Correpta ultima in Pelio more Græcorum
 propter sequentem vocalem, quod & fecit quandoque Virg. imponere
Pelio Ossam, Credimus an qui amant, & alibi sæpius.

V. 698. *Stygia Titaresus ab unda.* De hoc fluvio scribens Strabo,
 bituminoso, inquit, liquore fluit, atque ejus natura, ut cum aqua
 misceri non possit. Cui Plinius consonans l. 2. c. 8. Accipit, inquit,
 Peneus Eurotam annem (ita enim ille appellat, quem Homerus,
 Lucanus, Strabo, & Tragœdus Seneca Titaresum) nec recipit; sed
 olei modo supernatantem, ut dictum est ab Homero, brevi spatio
 portatum abdicat, penales aquas dirisque genitas argenteis suis
 misceri recusans. Quod autem Plinius Penei pulchritudini, id Lu-
 canus Titaresi dignitati, ac nobilitati tribuit, quem nos sequuti ce-
 cinimus Alexandr. I.

„ Post Peneum irruptit, lapsuque per aquora summo
 „ Immixtas defendit aquas, fluvijque minoris
 „ Contactum effugiens, Superum sibi servat honores.
 Quippe ab Styge ortus, Dii cuius jurare timent, & fallere numer.

Amnis Cœlicolum irrevocabile juramentum.
 Hi denas, geminasque agitant per cœrula puppeis.
 Sed quater hinc denis Prothous Tenthredone gnatus
 Pubem agit, umbrosos quæ circum Pelion agros,
 705 Et sata culta tenet, plena qua argenteus urna
 Labitur, herbososque thoras rigat agmine Peneus.
 Hæ Danaum turmæ, atque duces. Nunc tu mihi, Diva
 Calliope, memora quis præstantissimus horum
 Sanguinea in pugna? quis equis pernicibus esset?
 710 Grajorumque duces longe Telamonius Ajax
 Anteit, Atridæ dum Larissæus Achilles
 Indignatus abest, nam quis contendere magno
 Æacidæ posset? picta nunc puppe quiescens
 Ille jacet rabido percussum corda dolore.
 715 Ast Dolopum manus, Hellenes, turbæque superba
 Myrmidonum hac illac fulva luctantur arena:
 Pars in litoreis exercent membra palestris,
 Pars disco, aut jaculo celeri, certantve sagitta.
 Stant terræ defixa hastæ, ac tentoria propter
 720 Aurataæque rotæ, & currus servantur inanes.
 Tum bellator equus lotumque, herbasque palustreis
 Carpebat plenis præsepibus; at genere horum
 Non quisquam Grajum eximio certarit Achilli,
 Nec celeri auderet cursu contendere bigis.
 725 Laudantur juxta pulcherrima corpora equarum
 Eumeli Pheretiadæ, volucremque sagittam,
 Quæque leveis rapidis anteirent cursibus auras.
 Pieria in magna has quondam nutritivit Apollo
 Aurea tela gerens, bellique aptavit in usus.
 730 Dorsum æquale, pares anni, color omnibus idem.
 Tum ceu flamma volans totos depascitur agros
 Et sonitum ingentem late ciet excita tellus,
 Jupiter armata geminat quum fulmina dextra,

V. 716. Fulva luctantur arena. Militum in otio oblectamenta, quæ Virgilius ad camporum Elysiorum inçolas transtulit lib. 6.

Et strepitu Prochyta alta tremit, durumque cubile
 735 In Arimis, Jovis imperiis imposta Typhœo,
 Haud secus Argivum properantum tota tumultu
 Terra tremit, fremitu cœlum circumtonat ingens.
 Interea ad Teucros perniciibus ocyor Euris
 Ab Jove missa volat picto Thaumantias arcu.
 740 Forte aula in magna Priami juvenesque, senesque
 Soliciti inter se summis de rebus agebant.
 His Dea se immiscet, vocemque, atque ora Politæ
 Adsimulans Priamo geniti, qui non procul urbe
 Æsyetæ senis ad tumulum, speculaque reposta
 745 Subjectam classem, & castra observabat Achivum.
 Tum sic orsa loqui: Semper tibi copia fandi
 Larga, senex, & pace quidem florente licebat;
 Nunc nos arma premunt, & ineluctabile bellum.
 Sæpe ego nam Martem indomitum, pugnamque se-
 quutus;
 750 At taleis nunquam, ac tantas turmasque, virosque,
 Invictosque duces vidi, quot gramine toto
 Circumeunt muros, incurvaque litora complent,
 Quot nemorum folia, aut bibulas mare lambit arenas.
 Propterea tu, pubem, Hector, fer primus in hostem.
 755 Tum lectas sociorum acies, genteisque superbæ

V. 734. Et strepitu Prochyta alta. Ita hunc locum Homericum reddidit Virgil. in 9, ubi, inquit Ruæus, duo videntur a Virgilio sane facta audacter. Primum, quod Arimos populos Pythacusæ insula adjectit, qui apud alios Cilicie, aut Lydia, aut Syria incole esse dicuntur. Secundum quod vocet illas eiv. Apipos, que Homeri sunt, & Hesiodi in unum substantivum composuerit. Nec Plinii longe posterioris, aut Scaligeri Græcæ lingue ignari auctoritate defendi potest, quod Cerda voluit. Quid si Virgilius non Inarime, sed in Arimis scripsit, ut hic nos? At enim Ovidius, Statius Papinius, Silius, Lucanus, Plinius, Claudianus Inarime quoque scripserunt Virgilium proculdubio sequuti. Quod vero Homerus non Inarimen, sed in Arimis scriperit, Hesiodi, & antiquorum omnium codicum auctoritate convincitur contra Plinium. Vide si lubet Homeri in hunc locum, & Virgilii interpretes.

I L I A D I S

Tam varias linguis, habitu quam vestis, & armis
Unus in arma ferat duxorum quisque suorum.
Hæc infit, paretque Hector, cœtumque resolvit:
Arma fremunt, tota passim procurritur urbe,
760 Panduntur portæ ingentes, equitum, peditumque
Turba ruit, magno fervet via cuncta tumultu.
Urbe procul muros contra, ac tentoria Grajum
Colle tumet tellus modico, cui pronus in altum
Hinc, atque hinc aditus medio patet æquore campi.
765 Terrigenæ Batiea vocant, sed dicta Myrinnes
Culmina Cœlicolis prisæ de nomine Nymphæ.
Hic tunc indigenæ, sociorumque agmina Regum
Explicuere acies. Trojanos maximus Hector
Priamides numero ingenti, lectosque regebat.
770 Dardaniis Anchisiades dux imperat heros,
Quem Venus Idæo conceptum vertice fudit,
Mortalis Dea pulchra viri dignata hymenæos.
Archilocus comes huic, Acamasque Antenore gnati,
Par bello egregium: Troas sed Pandarus ingens
775 Lecta Lycaonides regit agmina, quæque Zeliam,
Ideasque serunt valleis, quæ rauca fluenta
Æsepi, camposque domat gens dives opimos.
At qui Adrestiam, Terienque, Pythæaque rura,
Et campos, Apœse, tuos proscindit aratro
780 Amphius hos in bella viros, & pulcher Adrastus
Imperiis duxere, Merops Percofius ambos
Quos gemitu pater, & lacrimis revocare furenteis
Tentavit frustra, Iliacisque avertere campus
Vaticinans; sed fata tamen sua quemque sequuntur
785 Terrigenum, placidasque virum Deus obstruit aureis.
At qui Percotem juvenes, & Praction altum
Seston, Abydenasque arceis, & nobilem Arisben
Circum habitant, magnum Hyrtacides regit Asius
agmen,
Asius Hyrtacides, magna quem mole superbi
790 Adtulerant biiuges patriis Selleentis ab oris.

L I B E R I I.

Hinc Larissæi portabant arma Pelasgi;
Hippothous præit, atque Pyleus, Mavortia fratum
Pectora, Theutamidæ soboles fortissima Lethi.
Threjcos Achamas cuneos, Pyrouisque regebant,
795 Et quotquot rapidus complectitur Hellespontus.
Euphemus Ciconum turmas in prælia dicit
Træzenii Ceadæ proles, tum Pæonas arcu
Insignes curvo Pyræchmes congregat heros
Ex Amydone procul, quos Axius irrigat agros,
800 Axius illimi fluvius pulcherrimus unda.
Inde Pylæmeneus multa vir callidus arte
Paphlagonas rapit ex Enetis, unde exstat agrestum
Mulorum genus eximium, Cromnamque, Cytorumque,
Ægialonque urbem antiquam, ripasque salubreis
805 Parthenium propter fluvium, qui Sesamon almæ
Felicem Cereri inde habitant, celosque Erythinos.
Acer Alizones Odiusque, & Epistrophus armant
Ex Alibe procul, argenti qua fœta metallo
Ditescit tellus. Mysos Chronis impiger urget,
810 Ennomus atque augur; sed non depellere pestem
Augurio potuit, telo confossus Achilli
Cum sociis liquidam Phrygii Simoentis ad undam.
Phorus, & Ascanius Phrygios patria usque trahebant
Ascania, duro ardenteis decernere ferro.
815 Mæonium Mesthles, atque Antiphus agmen agebant,
Ambo Pylæmeneo gnati, stagnantibus undis
Quos Gygæa palus peperit, Tmolique nivalis
Secum agitant pubem, queis agmina barbara jungunt,

V. 802. *Paphlagonas rapit ex Enetis.* Alii scribunt cum adspiratione Henetis, unde mutata adspiratione in V. facti sint Veneti. Henetus porro cum magna Teucrorum, & finitimarum populorum parte, duce Antenore, in intimum Adriatici maris sinum penetrasse scribunt aliqui apud Sigonium de antiqu. jur. Italiz lib. I. cap. 25, ibique de nomine eversæ patriæ urbem Trojam condidisse. Vide Virgilii interpres ad I. Æneidos, ubi de Antenoris in Italiā adventu & Patavina urbe.

I L I A D I S.

Miletum quicunque habitant, frondosaque Phtius
 320 Culmina, Mæandri quisquis sinuosa fluenta,
 Quique tenent Mycales vexata cacumina ventis.
 Nasthes, Amphimachusque, Nomeone natus uterque,
 Ductores, Caresque regunt in bella superbos.
 Nasthes, Amphimachusque innuptæ more puellæ
 325 Pictus acu tunicas demens, & fulgidus auro;
 Profuit at misero nequicquam lana veneno
 Tincta peregrino, & compti sub casside crines,
 Æacidae ut ferrum, & mortem vitaret acerbam.
 Denique Sarpedon Lycios, Glaucusque regebant
 330 Ab Lycia tellure procul, quæ jugera Xanthus
 Vorticibus secat, & fulva fæcundat arena.

LIBER TERTIUS

A R G U M E N T U M .

Instructa utrinque acie, visoque Menelao Paris fugit; postea tamen ab Hectore increpitus Menelaum ipsum ad singulare certamen provocat. Agamemnone, Priamoque præsentibus pacta firmantur. Victum Paridem Venus rapit, & in proprium thalamum abducens arcessit ab muro Helenam, ubi illa Priamo roganti primos Græcorum duces ostenderat. Agamemnon, ut starent promissis, Trojanos admonet.



Am Danaum campis exercitus ibat apertis,
 Quū subito immensū clamorem ad sidera tollunt
 Dardanidæ ex alto, quales sub nubibus atris
 Strymoniæ dant signa grues, atque æthera
 tranant

5 Cum sonitu, fugiuntque hiemem, repetuntque fluenta
 Oceani, tepidasque plagas clangore secundo

V. 3. Quales sub nubibus atris. Comparationis hujus partem aliquam delibavit Virgilius, cuius ea sunt verba in 10. Strymonias

L I B E R III.

Tristia Pygmæis portantes bella colonis.
 At parte ex alia spirantes robur Achivi,
 Inque vicem prompti auxilium sibi ferre, silentes
 10 Arva terunt, tum piniferi ceu e vertice montis
 Quum nebula exurgit, lapidem non quidlibet ultra
 Jactum quisque videt: tacitis aptissima furtis
 Illa dies, minus atque ullo non tempore prudens
 Incustodito discedet pastor ovili,
 15 Sic pedibus Danaum tellus percussa comantum
 Pulveream coit in nubem. Forte agmine primo
 Dardanidum forma ante omneis pulcherrimus ibat
 Ipse Paris, cinctus maculosi tegmina pardi,
 Fulmineumque ensem lateri, tum voce vocabat
 20 Grajugenæ duro ut vellent contendere Marte,
 Bina manu lato crispans hastilia ferro.
 Hunc tamen ut magnis gradientem passibus ipsam
 Ante aciem procul adsperxit Menelaus Atrides,
 Impastus stabula alta leo ceu sæpe peragrans,
 25 (Sudet enim vesana famæ) si forte fugacem
 Conspexit capream, aut surgentem in cornua cervum,
 Gaudet hians immane, comasque arrexit, & hæret
 Visceribus super accumbens, lavit improba teter
 Ora cruar, juvenumque minas contemnit inaneis,
 30 Latratusque canum, adspecto sic fervidus hoste
 Æstuat Atrides, Helenamque, & jura sacrati
 Infracta hospitiî flagrantî in pectore versat.
 At Paris heroem cernens horrenda minantem
 Obstupuit, gressumque simul cum voce repressit,

autem eas vocat, quia frequentes circum Strymonem Macedoniae
 fluvium in confinio Thraciæ, ubi quum Geramam urbem Pygmæi
 condidissent, a gruibus fugatos, & novas sibi sedes querere coactos
 fuisse scribit Plinius lib. 4. c. II. inde illud Juven. Sat. 13.

" Ad subitas Thracum volucres, nubemque sonoram
 " Pygmæus parvis currit bellator in armis &c. "

V. 24. Impastus. Ita hanc comparationem reddidit Virg. lib. 10.